

## **Pol ndê bapia têŋ lau Kolosi-ŋga Yom whê bapia dindéc sa-ŋga**

Malac Kolosi yêc gameŋ Esia-ŋga, magoc Pol dau inŋ gêm mêtê yêc malac Kolosi dom. Têŋ ndoc inŋ gêm mêtê mbo malac Epesas, naŋ ŋgac Kolosi-ŋga danŋ ŋaê Epapras ŋgô ma kêŋ whiŋ, ma tiŋambu Epapras mbu gi hoc ŋawaê ŋayham asê yêc ndê malachu Kolosi (1:7; 4:12), ma lau ŋatô sic hu sêkêŋ whiŋ Yisu. Tiŋambu Epapras ndöc gapocwalô whiŋ Pol (Pilemon 23), ma gic miŋ têŋ Pol pi lau sêkêŋ whiŋ-ŋga yêc malac Kolosi.

Pol to bapia dindéc ma sôm têŋ lau Kolosi-ŋga bu inŋ gêm danŋe Anötö tu ŋac si sêkêŋ whiŋ-ŋga, ma inŋ tôc lêŋ ŋayham daêsam têŋ lau sêkêŋ whiŋ-ŋga tu sêŋkuc-ŋga. Ma inŋ to yom ŋatô bu whê lau Kolosi si gauc sa pi yom ŋandô. Nahu bu lau ŋatô sêŋsônŋ ŋac pi lau nom-ŋga si lêŋ ŋatô (2:4, 8, 16-23), ma ŋac sêtoc Kilisi sa ŋapep dom, ma bocdinaŋ inŋ tôc asê bu Anötö kêŋ gêŋ honŋ sêsoç Kilisi ŋapu (1:15-20; 2:9-15).

### *Pol gic hu ndê bapia*

<sup>1</sup> Aô Pol, naŋ gati Yisu Kilisi ndê aposel kêkuc Anötö ndê atac whiŋ, lu yac neŋ asidôwa Timoti ato bapia dindéc. <sup>2</sup> Ato têŋ mac asidôwai naŋ andöc malac atu Kolosi, mac lau dabuŋ naŋ akêŋ whiŋ Kilisi. Mwasinŋ ti yom malô akêŋ Damaŋ Anötö têŋ mac.

*Pol tenj mbec tu lau Kolosi-nga*

<sup>3</sup> Tôm bêc honj yac atenj mbec tênh Anötö, yac nenj Pômdau Yisu Kilisi Damba, ma am danje inj tu mac-nga. <sup>4</sup> Nahu bu yac anğô njawaê bu mac akênj whinj Yisu Kilisi njanga, ma atac whinj Anötö ndê lau dabunj honj. <sup>5</sup> Mac nem akênj whinj ti atac whinj nahu sip mwasiñ atu nanj mac akênj batam ambo, nanj Anötö po sa gwananj tu mac-nga yêc undambê. Yom pi gênj dau mac anğô munj su, tênh ndoc sêhoc yom njandô njawaê njayham-nga asê tênh mac. <sup>6</sup> Njawaê njayham dau tênh mac menj, ma mac anğô ti anjalê yom njandô pi Anötö ndê mwasiñ atu. Tênh ndoc mac anğô tiwakuc e menj tênh kwahic dec, nanj njawaê njayham dau gêm njandô ma tiapa yêc mac nem gameñ. Ma njalênj tigenj inj gêm njandô ma tiapa ma gêm gameñ nanj lau Rom-nga sem gôlinj, nanj ahuc. <sup>7</sup> Njawaê dau Epapras kédôhônj tênh mac. Inj yac nenj njac atac whinj-nga nanj gêm gwelenj whinj yac, ma njac akinj njandô nanj gêm akinj Kilisi tu mac-nga. <sup>8</sup> Ma inj gic minj tênh yac pi mac nem lênj atac whinj asidôwai-nga nanj Njalau Dabunj kênj tênh mac.

<sup>9</sup> Tu dinanj-nga tênh bêc njamata-nga nanj yac anğô mac nem njawaê e menj tênh kwahic dec, nanj yac atenj mbec tu mac-nga njapanj. Yac andac Anötö bu kênj gauc tênh mac e anjalê Njalau Dabunj ndê lênj tidônj. Ma njalênj dinanj mac oc anjalê lênj nanj Anötö tac whinj bu yac dasa-nga, nanj njapep enj. <sup>10</sup> Yac atenj mbec bu mac asa nem lênj gitênj, bu tôc asê bu mac ati Pômdau ndê lau, ma inj oc lic mac nem lênj honj ndic inj tandô njayham. Yac atenj mbec bu mac nem akênj whinj oc nem njandô njayham yêc gwelenj honj nanj mac akôm, ma bu mac nem gauc anjalê Anötö-

nga ênsôwec tiatu. <sup>11</sup> Anötö ndê ñaclai ti ñawasi atu kên ñanğa tên mac bu akôm gên hon, ma ñawapac bu tap mac sa, dec mac atôm bu alhac ñanğa ma ahôc ti atac pa su. Ma ambo ti atac ñayham, <sup>12</sup> ma anem danđe Daman Anötö, nan gic dabin mac e atôm bu awêkain in ndê gameñ ñawê-nga awhin in ndê lau dabun hon. <sup>13</sup> In kêgaho yac su yêc ñaclai ñasec-nga, ma kên yac dambo in ndê Atu nan in atac whin ñandô, nan ndê gôlin ñapu. <sup>14</sup> Ma Anötö kêmwasin yac, dec gêmlihi yac ti kêgapwêc yac su yêc sakin mêtê sac-nga, ma suc yac neñ sac kwi. Ma datap mwasin atu dau sa yêc in ndê Atu dau.

### *Kilisi ti ndê gwelen*

<sup>15</sup> Lau dan sêlic Anötö dom, magoc in Atu Kilisi gêm in anğô ma tôc in asê tên yac. In tinamata gên hon nan Anötö kên. <sup>16</sup> Bu gên undambê-nga ti gên nom-nga hon nan Anötö kên, nan kên ña Kilisi. Gên nan dalic ña tanôn, ma gên nan tôm dom bu dalic ña tanôn, gitôm anela me ñalau me gôlin ma ñaclai tidau-tidau, gên hon dinañ Anötö kên ña Kilisi ma kên tu Kilisi-nga. <sup>17</sup> In tinamata gên hon, ma gên hon si ñahu sêmbo-nga yêc in. <sup>18</sup> Ma in gêm gôlin gôlôwac dabun. In ti ñagôlôn, ma gôlôwac dabun sêti in ndê ñandô. Ma in mun gôlôwac dabun bu ti ñgac ñamata-nga bu tisa akên lau batê-nga. Ma bocdinañ gên dan hóc gêlêc in su dom. <sup>19</sup> Bu Anötö gêlic ñayham bu kên dau sambuc sip Atunğac ñalôm ma mbo whin in. <sup>20</sup> Ma in kêkin Atu dau sip nom meñ bu hé wamba ñamalac ma gên nom-nga ti gên undambê-nga hon tên Anötö. Ma kwahic dec ñamalac sêtôm bu sêmbo Anötö anğô-nga ti yom malô, tu Atunğac ndê dac nan kêc sin pi a gicso-nga.

<sup>21</sup> Muñ-nga, mac ambo ahê têtê Anötö. Mac ambo atôm in ndê ñacyo tu gauc ti mêtê sac-sac nañ yêc mac-nga. <sup>22</sup> Magoc in dau kêmasañ lêt bu Kilisi sip nom meñ ti ñamalac ma mbac ndu, tu bu hê wamba mac têtê Anötö tiyham. Ma in tac whin bu kêt mac alhac in anğô-nga atôm lau dabuñ nañ nem giso ti yom mbasi. <sup>23</sup> Mac bu alhac ti akêt whin ñanğa ma akêt batam Anötö ndê mwasiñ nañ ñawaê ñayham tôc asê têtê mac, ma ahu siñ dom, dec mac oc atap mwasiñ dau sa. Ñawaê ñayham dau mac anğô su, ma sêhoc asê yêc gameñ hoñ nañ yêc lau Rom si gôlin ñapu, nañ bocdinañ. Ma aö Pol gati ñgac akiñ ñawaê ñayham dau-nga.

*Pol whê ndê gwelen ñawaê ñayham-nga sa*

<sup>24</sup> Ñandê bocke nañ aö gahôc tu wapuc mac nem akêt whin dôn-nga, nañ gahôc ti atac ñayham eñ. Ma aö kayalê bu aö gac waê bu wahôc ñandê ñapan, tu gwelen nañ aö gakôm tu bu wapo Kilisi ndê ñandô, nañ gôlôwac dabuñ sa-nga. M agoc aö oc wahôc e wandic dabiñ gêt hoñ nañ Kilisi kêyalin sa bu wahôc. <sup>25</sup> Aö gakôm gwelen gam akiñ gôlôwac dabuñ, kakuc lêt nañ Anötö dau kêmasañ dec kêyalin aö sa tu mac-nga, ma kêkin aö bu wahoc ñawaê ñayham asê e Anötö ndê yom tiapa yêc gameñ hoñ. <sup>26</sup> Têtê ñamata-nga e meñ, yom pi Anötö ndê lêt nem lau si-nga, nañ ñahu yêc siñ dau têtê lau nom-nga. Magoc kwahic dec in tôc asê tiawê têtê in ndê lau dabuñ. <sup>27</sup> In tac whin bu lau dabuñ sêtñyalê yom nañ muñ-nga yêc siñ dau, nañ bocdec bu. In bu êmwasiñ mac ñlau gameñ apa-nga bu atap in ndê ñawasi atu sa, dec kêt Kilisi sip nem

ñalôm. Ma gêñ dinan ti mac nem ñahu akêñ batam bu atap in ndê ñawasi sa-ñga.

<sup>28</sup> Yac ahoc Kilisi ndê ñawaê ñayham asê, ma Anötö kêñ gauc ñayham têtñ yac bu akêñ puc ti andôhôn lau sêkêñ whin-ñga hon. Ma yac akôm bocdinañ tu bu andic dabin ñac hon e akêñ ñac sêlhac Anötö anğô-ñga sêtôm lau gwalam akwa sêkêñ whin Kilisi-ñga. <sup>29</sup> Ma aö gakôm gwelen ti gahôc ñandê atu, tu bu wakôm gêñ dau ñandô sa-ñga, ña Kilisi dau ndê ñaclai nan gêm gwelen ñanğa yêc aö neñ ñalôm.

## 2

<sup>1</sup> Aö gawhê neñ gwelen sa têtñ mac, ñahu bu aö atac whin bu mac anjalê bu aö gayêm daun su ñandô tu mac-ñga, ma tu lau Laodisia-ñga, ma tu lau sêkêñ whin-ñga hon nan sêlic aö anôn dom-ñga, nan bocdinañ. <sup>2</sup> Aö tac whin bu mêtê atac whin-ñga piñ mac hon dôñ, ma puc mac dôñ bu alhac ñanğa. Ma yom pi Anötö ndê lêtñ nem lau si-ñga nan mun-ñga yêc sin dau, nan aö tac whin bu mac anjalê tidôn andô, e kôm mac alhac ti akêñ whin ñanğa eñ. Yom dau hêganôn Kilisi. <sup>3</sup> Bu yom ti gauc nan atu andô ma tôm bu êmwasiñ yac-ñga, nan Anötö gêm ahuc yêc in-ñga.

<sup>4</sup> Aö gawhê yom hon dinan sa têtñ mac, ñahu bu aö gatec bu lau ñatô sêmbac yom mac ma sêñsau mac. <sup>5</sup> Bu aö daun gambo gawhin mac dom, tigen yêc aneñ ñalôm aö gauc gêm mac ñapan. Ma aö atac ñayham atu, bu kayalê bu mac akêñ whin Kilisi ñanğa, ma asa nem lêtñ hon ñapep.

*Dasa neñ lêtñ tiwakuc tu Kilisi-ñga*

<sup>6</sup> Mac akôc Yisu Kilisi sa su ti mac nem Pômdau, dec akêñ inñ tiñamata nem lêñ honñ. <sup>7</sup> Akôc ñanğa yêc inñ tòm a nanñ ñawakac gacgenñ sip nom ñalôm gi. Ma inñ ndê ñaclai po mac nem akêñ whinñ sa bu alhac ñanğa, alhac yom ñandô nanñ sêndôhônñ têñ mac, nanñ ñahô. Ma yom anem danğe Anötö-ñga nem mac ahuc tòm bêc honñ. <sup>8</sup> Ayob daôm ñapep bu lau tasanñ si yom ñambwa-ñambwa êñsônñ mac nem gauc ma êngaho mac su yêc yom ñandô e ati lau gapocwalô-ñga lec dom. Ñac si yom dau ñahu kêkuc abunğaci si lêñ ti mêtê nom-ñga ñambwa, ma menñ akêñ Kilisi ndê dom.

<sup>9</sup> Bu Anötö kêñ dau sambuc sip Kilisi ñalôm, ma menñ mbo nom gitôm ñamalac. <sup>10</sup> Kilisi dau inñ gôlinñ ti ñaclai honñ ñadau. Ma tu mac nem akêñ whinñ piñ mac dôñ am daminñ inñ-ñga, dec Anötö ndê mwasiñ gêm mac ahuc. <sup>11</sup> Kilisi kôm lau Israel-ñga si ðpwac sêsê ñamlic ñatô su-ñga ñandô sa pi mac lau nanñ ati inñ ndê. Gêñ dau hóc asê kêkuc ñamalac si lêñ sêsê ñamlic-ñga dom, magoc Kilisi dau kôm gwelenñ yêc mac nem ñalôm gitôm inñ sê mac nem mêtê sac ñalôm akwa-ñga su giñga. <sup>12</sup> Busanğı nanñ mac alinñ, nanñ piñ mac dôñ am daminñ Kilisi, tòm sêñsuhunñ mac awhinñ inñ, ma Anötö unñ mac sa awhinñ inñ. Gêñ dau ñandô sa tu mac akêñ whinñ Anötö, nanñ unñ Kilisi dau sa akêñ lau batê-ñga, nanñ ndê ñaclai.

<sup>13</sup> Muñ-ñga, mac ambo atôm lau batê tu mac nem sac-ñga, ma tu mac asap mêtê ñalôm akwa-ñga dôñ ñapanñ-ñga. Tigenñ Anötö suc mac nem sac honñ kwi, ma kôm mac ati lau ambo tamli tiyham-ñga awhinñ Kilisi. <sup>14</sup> Tu yac tanğili Anötö ndê yomsu-ñga, dec yac datôm lau nanñ si bapia tốp-ñga yêc, ma datôm dom bu dandic tốp dau, dec tac waê bu

datap matôc sa. Magoc Anötö kôc bapia tôp-nga dau su yêc yac, ma gic pi a gicso dau whiŋ Kilisi. <sup>15</sup> Ma Kilisi ndê mbac ndu pi a gicso dau ti lêŋ bu Anötö ku Sadaŋ ti ndê ŋalau ma ŋaclai sac hoŋ dulu, gitôm ŋgac bata siŋ-nga naŋ kôc ŋacyo si wapa siŋ-nga hoŋ su, ma wê ŋac gitôm lau gapocwalô-nga bu tôc asê tiawê bu ŋac si ŋaclai pacndê sambuc.

*Yom pi ŋagôliŋ nom-ŋga*

<sup>16</sup> Tu dinaŋ-nga dec lau ŋatô bu sêŋgôliŋ yom pi mac tu gêŋ naŋ aŋ ti anôm-nga, me tu om naŋ lau sêlic tôm wake me ayô me yala-ŋg a, me tu bêc Sabat-nga, naŋ aŋgô ŋac si yom dom. <sup>17</sup> Bu gêŋ hoŋ dinaŋ gitôm gêŋ ŋagatu ŋambwa naŋ dalic muŋ su, ma tiŋambu ŋandô meŋ hôc asê. Ma ŋandô dau, naŋ Kilisi. <sup>18</sup> Lau ŋatô sêŋkuc lêŋ ŋalôm akwa-nga ma sêtoc dau sa tu ŋac si lêŋ sem akiŋ Kilisi-nga. Ŋac sêsôm bu sêpu dau ŋandô, ma sem akiŋ aŋela kêkuc gêŋ ŋatô naŋ sêyêc mbê ma sêlic. Lau kaiŋ dinaŋ b u sêpu mac ma sêsôm bu mac nem a kêŋ whiŋ iŋ gêŋ ŋandô mbasi-nga, dec akôc ŋac si yom sa dom. <sup>19</sup> Bu lau kaiŋ dinaŋ sêsap Kilisi, naŋ ti gôlôwac dabuŋ hoŋ si ŋagôlôŋ, naŋ dôŋ dom. Iŋ tawasê piŋ yac hoŋ dôŋ dapitigeŋ, ma gôlôwac d abuŋ kêsôwec ŋa ŋaclai naŋ Anötö dau kêŋ.

<sup>20</sup> Aŋgô su naŋ. Têŋ ndoc ŋamalac d aŋ mbac ndu, naŋ ŋagôliŋ ti ŋaclai nom-nga gêm gôliŋ iŋ tiyham dom. Ma tu Anötö piŋ mac dôŋ am damiŋ Kilisi-nga, dec tôm mac ambac ndu awhiŋ iŋ. Bocdinaŋ tu sake-nga mac ambo atôm lau naŋ sêhêgo dau pi ŋagôliŋ nom-nga? <sup>21</sup> Lau kaiŋ dinaŋ sic yao gêŋ tidau-tidau ma sêsôm bocdec bu, “Akôc dom, aneŋ ti anôm dom, ma amasec dom.” <sup>22</sup> Yom kaiŋ dinaŋ

kêkuc gauc ti ñagôliñ nan lau nom-nga sêndôhôn, ma hêganôn gêñ têm kwahic dec-nga nan tan ti danôm ma gêñ dau meñ giñga. <sup>23</sup> Lau nan sêsôc ñagôliñ kain dinan ñapu, nan sêñkuc gauc ñamalac-nga tu lêñ sênem akiñ Anötö-nga ti sêñgwiniñ dau-nga ma lêñ sêkêñ wapac pi dau ñamlic-nga. Sêtoc lêñ dau sa gitôm lêñ ti gauc atu, ma gauc gêm bu oc ndic Pômdau tandô ñayham. Magoc mba. Lêñ dau hêganôn gêñ awê-nga ñambwa, ma oc tôm dom bu nem ñac si ñalôm kwi e sêhu lêñ ñalôm ñagalac-nga siñ.

### 3

#### *Kilisi ti yac neñ dambo tanli ñahu*

<sup>1</sup> Anötö uñ mac sa awhiñ Kilisi, ma kwahic dec iñ ndöc Anötö ndê andô-nga yêc undambê. Tu dinan-nga dec asa nem lêñ ti tamkwê gêñ undambê-nga eñ. <sup>2</sup> Gauc nem gêñ nom-nga êñlêc dom. Gauc nem gêñ undambê-nga hôc gêlêc. <sup>3</sup> Bu mac ambac ndu su awhiñ Kilisi, ma mac nem ñahu ñ andô ambo tamli awhiñ Kilisi-nga, nan yêc siñ dau yêc Anötö-nga. <sup>4</sup> Têñ ndoc mac nem tamli ñahu Kilisi dau meñ hôc asê, nan Anötö oc tôc mac nem lêñ ambo tamli-nga asê tiawê, ma mac oc alhac awhiñ Kilisi ti ñawasi atu.

#### *Lêñ ñalôm akwa-nga*

<sup>5</sup> Bocdinañ ahu mêtê sac hon nan meñ akêñ ñalôm akwa, nan siñ. Mêtê dau gitôm mac nem ñacyo dan nan kalhac señ andöc tamli-nga ahuc, bocdinañ andic iñ ndu. Mêtê kain bocdec ahu hon siñ, mêtê mockain-nga, mêtê ñadômbwi, ma mêtê sac-sac ñalôm ñagalac-nga. Ma ayob daôm bu añkuc



lau nanj sêkêŋ awa ti wapa nom-ŋga kalhac si gauc ŋamata ŋapaŋ, nanj dom. Bu lêŋ dau gitôm ŋac sem akiŋ anötö gwam. <sup>6</sup> Lau hoŋ nanj sêsa lêŋ kaiŋ dinaŋ, oc sêtap Anötö ndê atac ŋandê sa. <sup>7</sup> Muŋ-ŋga, mac daôm akôc gauc tôm ŋac lau dinaŋ sêkôc, ma aŋkuc ŋac si mêtê sac. <sup>8</sup> Magoc kwahic dec ahu mêtê sac hoŋ siŋ. Atac ŋandê têŋ lau me alic ŋac sac dom, ŋalôm li sa dom, ma ayob nem whamsuŋ bu asôm yom sac-sac apu lau-ŋga ti yom mayan-ŋga dom. <sup>9</sup> Ma asôm yom tasanj têŋ nem asidôwai dom. Gauc nem bu mac ahu lêŋ ŋalôm akwa-ŋga siŋ su, dec akôm mêtê kaiŋ dinaŋ tiyham dom. <sup>10</sup> Ma asa nem lêŋ ti ŋalôm wakuc. Bu Anötö, nanj kêmasanj ŋamalac bu sênem inj aŋgô sêmbo nom, nanj gêm gwelenj pi mac mbo, tu bu mac atiwakuc, ma tu bu mac aŋyalê inj ti ndê lêŋ gitêŋ tidôŋ. <sup>11</sup> Ma yac lau nanj dasa lêŋ wakuc dinaŋ, nanj dahêgo dauŋ tu yac neŋ ŋahu nom-ŋga tiyham dom. Yac bu lau Grik me lau Israel-ŋga, gai me lau aŋgô batac, lau nanj taŋkuc pwac sêsê ŋamlic-ŋga me taŋkuc dom, lau akiŋ ŋambwa me lau nanj dau sêmbo si gêŋ, nanj Anötö gauc gêm lêŋ hoŋ dinaŋ ŋadaŋ hóc gêlêc su dom. Gêŋ tigenj nanj gêŋ atu têŋ inj, nanj Kilisi piŋ yac hoŋ dôŋ dati inj ndê.

### *Lêŋ ŋalôm wakuc-ŋga*

<sup>12</sup> Anötö tac whiŋ mac ma kêyalinj mac sa ati inj ndê lau dabuŋ. Tu dinaŋ-ŋga dec asap mêtê ŋayham bocdec dôŋ gitôm mac asôc ti nem ŋakwê. Tamwalô lau ma atac apu ŋac ti nem ŋalôm sambuc, aŋgwiniŋ daôm, asa lêŋ malô, ma akôc nem ŋalôm dôŋ. <sup>13</sup> Asa nanj ndê asidôwa kôm sac têŋ inj, nanj kôc ndê ŋalôm dôŋ bu hóc ŋawapac dau,

ma suc in̄ ndê sac kwi. Asuc sac nañ asidôwai sêkôm têñ mac nañ kwi, tôm Pômdau dau suc mac nem kwi. <sup>14</sup> Ma asap mêtê atac whin̄-nga dôñ, bu mêtê dau piñ mêtê ñayham-ñayham hoñ dôñ sêpitigeñ. <sup>15</sup> Kilisi ndê yom malô nem gôliñ mac nem ñalôm. Bu Anötö kêgalêm mac sa bu ati gôlôwac dabuñ tigeñ, nañ yom malô dau piñ mac dôñ. Ma anem dan̄ge Anötö ñapañ. <sup>16</sup> Kilisi ndê yom ñandô nem mac nem ñalôm ahuc sambuc, dec kêñ gauc ñayham têñ mac bu anem la ti andôhôn̄ têñ daôm. Anem wê yêc Buku Wê-nga, ti wê dabuñ ma wê ñatô nañ Ñalau Dabuñ kêñ têñ mac, bu ampiñ Anötö ma anem dan̄ge in̄ ti nem ñalôm sambuc. <sup>17</sup> Gêñ hoñ nañ mac akôm ti yom hoñ nañ asôm, nañ akôm tu Pômdau Yisu ndê ñaê-nga. Ma anem dan̄ge Damañ Anötö tu Kilisi-nga.

*Damba ti dindai ma balêkoc si ñagôliñ ñatô*

<sup>18</sup> Mac lauwhê, asôc nem ñgaci ñapu, bu lêñ dinañ gic waê lauwhê nañ sêkêñ whin̄ Kilisi. <sup>19</sup> Ma mac laun̄gac, atac whin̄ nem lauwhê ma atigasec ñac dom. <sup>20</sup> Balêkoc, mac dan̄am wambu yom hoñ nañ dinam ti damami sêsôm têñ mac. Bu lêñ dinañ gic Pômdau tandô ñayham. <sup>21</sup> Mac dambai, ali nem balêkoc si ñalôm sa dom. Ayob ñac ñapep tu bu ñac lic ñakam sa e sêtec lêñ ñayham lec dom.

*Lau akiñ ma ñadaui si ñagôliñ*

<sup>22</sup> Mac lau akiñ, asôc nem ñadaui nom-nga si yom hoñ ñapu. Anem akiñ tu bu mac nem ñadaui sêlic mac ñayham-nga ñambwa lec dom. Mba. Mac nem ñadaui bu sêmbo sêwhin̄ mac me sêmbo dom, magoc akôm nem gwelen̄ hoñ ñapep en̄. Anem akiñ ti nem

ɲalôm sambuc, ma atôc asê bu mac atoc Pômdau sa. <sup>23</sup> Akôm gêɲ hoɲ ti nem ɲalôm sambuc eɲ, gitôm mac am akiɲ Pômdau, ma tôm mac am akiɲ lau nom-ɲga tawasê dom. <sup>24</sup> Mac aɲyalê su bu mac am akiɲ Kilisi mac nem Pômdau, ma iɲ oc kêɲ mac awêkaiɲ nem gêɲ lêɲsêm yêc undambê ti mac nem ɲagêyô ɲayham. <sup>25</sup> Magoc asa naɲ kôm giso, naɲ oc tap ndê ɲagêyô sa. Ma Anötö oc toc ɲamalac daɲ sa hôc gêlêc daɲ dom. Iɲ oc êɲsahê yac hoɲ ɲa saê tigenɲ.

#### 4

<sup>1</sup> Mac ɲadaui, aɲyalê ɲapep bu mac daôm nem ɲadau mbo undambê, ma bocdinaɲ ayob nem lau akiɲ ɲapep, ma ɲaôli bocke naɲ gic ɲac ɲawaê, naɲ akêɲ têɲ ɲac.

#### *Pol gêm la lau Kolosi-ɲga*

<sup>2</sup> Anem ali ma asap mêtê datenɲ mbec-ɲga ti danem danɲe Anötö-ɲga dôɲ ɲaɲga. <sup>3</sup> Ma atenɲ mbec tu yac-ɲga whiɲ, bu Anötö lêc gatam su têɲ yac bu ahoc iɲ ndê yom asê, ma bu awê yom pi Kilisi naɲ muɲ-ɲga yêc siɲ dau, naɲ sa tiawê. Tu Kilisi ndê yom dinaɲ-ɲga dec aö gandöc gapoc-walô. <sup>4</sup> Atenɲ mbec bu Anötö puc aö dôɲ bu wakôm neɲ gwelenɲ ɲapep, ma wawê yom dau sa yêc awê eɲ. <sup>5</sup> Asa nem lêɲ ambo lau sêkêɲ whiɲ dom-ɲga ɲalôm ti gauc eɲ. Ma aɲsalê lêɲ tu bu atôc Kilisi têɲ ɲac tôm bêc hoɲ. <sup>6</sup> Akôc gauc ɲapep pi yom asôm-ɲga bu asôm yom êmwasiɲ lau ti nem ɲac sa-ɲga, ma aô lau si yom ɲalêɲ ɲayham.

*Pol sôm bu êɲkiɲ Tikikus lu Onesimus sêtêɲ Kolosi sêndi*

7-8 Kwahic dec aö bu wañkiñ yac neñ asidôwa ma ñgac atac whiñ-ñga Tikikus têtñ mac loc. Inñ kalhac ñañga ma gêm akiñ Pômdau whiñ aö. Aö wañkiñ inñ loc bu ndic miñ aneñ yom, ma asidôwai gameñ dindéc-ñga si yom hoñ têtñ mac. Ma inñ oc nem malô mac nem ñalôm. <sup>9</sup> Ma aö wañkiñ Onesimus, nañ mac nem dañ ma yac mba asidôwa atac whiñ-ñga nañ kêtñ whiñ ñañga eñ, whiñ Tikikus têtñ mac loc. Inñ lu oc sêndic miñ yom gameñ dindéc-ñga hoñ têtñ mac.

*Pol kêtñ ndê acsalô têtñ lau ñatô*

<sup>10</sup> A ristakus, nañ ndöc gapocwalô whiñ aö, nañ kêtñ ndê acsalô têtñ mac, ma Banabas ndê têtñgac Mak kôm acsalô têtñ mac bocdinañ. Mak bu hóc asê mac, dec akôm tôm aö gasôm têtñ mac muñ su, ma akôc inñ sa. <sup>11</sup> Ma Jisas, ñgac nañ sêsam inñ ndê ñaê dañ bu Justus, nañ kêtñ ndê acsalô têtñ mac whiñ. Ñac lau tö dinañ sêmbo sêwhiñ aö ma sem malô aneñ ñalôm. Ñac lau Israel-ñga nañ sêkêtñ whiñ Kilisi, ma sem gwelenñ sêwhiñ aö ma yac ahoc ñawaê pi Anötö ndê gôliñ asê. Lau Israel-ñga daêsam sêmbo sêwhiñ aö dom, ñac lau tö dinañ solop. <sup>12</sup> Ma Epapras, Kilisi ndê ñgac akiñ, nañ mac daôm nem dañ, nañ kêtñ ndê acsalô têtñ mac bocdinañ. Inñ tôm bêc hoñ teñ mbec tu mac-ñga bu mac alhac ñañga atôm lau gwalam akwa akêtñ whiñ-ñga, ma asa nem lêñ hoñ tôm Anötö tac whiñ. <sup>13</sup> Aö wasôm yom ñandô têtñ mac bu inñ yêm dau su ñandô tu mac-ñga ñapañ, ma tu lau sêkêtñ whiñ-ñga nañ sêmbo malac Laodisia ma malac Hierapolis-ñga bocdinañ.

<sup>14</sup> Luk, dokta naŋ yac atac whiŋ, lu Demas sêkêŋ si acsalô têŋ mac whiŋ. <sup>15</sup> Akêŋ yac mba acsalô têŋ asidôwai Laodisia-ŋga, ma têŋ lau sêkêŋ whiŋ-ŋga naŋ sêkac sa yêc Nimpa ndê andu tu sêlic om-ŋga, ma têŋ Nimpa dau bocdinaŋ.

<sup>16</sup> Têŋ ndoc sêsam bapia dindéc têŋ mac su, naŋ akêŋ têŋ gôlôwac dabuŋ yêc Laodisia bu ŋac sêsam whiŋ. Ma bapia naŋ aô gakêŋ têŋ ŋac, naŋ sêkêŋ têŋ mac asam bocdinaŋ. <sup>17</sup> Asôm têŋ Akipus bu sap sakiŋ naŋ Pômdau kêŋ sip inŋ amba, naŋ dôŋ, ma kôm ŋapaŋ e ndic dabiŋ.

<sup>18</sup> Aneŋ ŋaê Pol dec, gato ŋa aô dauŋ amanŋ. Aô gacgeŋ gandöc gapocwalô, dec wandac mac bu gauc nem aô. Anötö ndê mwasinŋ whiŋ mac hoŋ.

**Anötö ndê Yom Lêñsêñ Wakuc**  
**The New Testament in the Bukawa language of Papua**  
**New Guinea**

**Nupela Testamen long tokples Bukawa long Niugini**

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 21 Feb 2024 from source files dated 31 Aug 2023

545e5ca3-1e95-59e4-8380-93951e023cf7